



24.10.2022

UKA2022/96

Paneeraq Olsen, Naleraq

Meeqqat atuarfianni angajullerni inuussutissarsiutinut sammiveqartut atuartsissutitut neqerooruteqarsinnaalernissamik periarfissiisinnaaneq pillugu Naalakkersuisut UKA2023 nallertinnagu nalunaarusioqqullugit aalajangiiffigisassatut siunnersuut.

(Inatsisartunut ilaasortaq Aqqalu C. Jerimiassen, Atassut)

Siunnersuuteqartumut Inatsisartunut Ilaasortamut Aqqalu C. Jerimiassen, Atassut Naleqqaminngaaniit qujavugut.

Siunnersuut soqutiginarluinnartoq meeqqat atuarfianni inuussutissarsiutinut sammiveqartut atuartsissutitut neqeroorutigineqalersinnaanerani siunnersuutaammat. Ullumikkut tamanna meeqqat atuarfianni neqeroorutaanngilaq naak suliniutit arlallit Naalakkersuisoq malillugu ingerlanneqaraluartut. Ullumikkut klassi ataaseq atuartut akuleriirlutik atuartuupput; atuagarsornermut soqutigisallit ilaalli assarsornermut tunngasutigut soqutigisaqarnerusut akuleriillutik atuartuupput. Naleqqamiit isumaqarpugut tamanna meeqqamut peqqinnangitsuusoq atuarusussusaannut paasissutissanillu tigooraasinnaanerannut killilersuillunilu akornutaalluarsinnaasoq.

Siusinnerusukkut isumasioqatigiinnerni peqataaffigisartakkanni ilinniartitsisut ilaatigut oqariartuutigisarpaat siusinnerusukkut atuartup sunngornissaanut atuartsisineq sammivilerlugu ingerlanneqartariaqartoq. Naleqqaminngaaniit tamanna isumaqatigisorujussuupput.

Meeqqat atuarfianni atuartut pisinnaasamikkut assigiinngitsorujussuupput. Ilaat atuagarsornermut piginnaasallit, ilaat assarsornermut piginnaasallit, ilaat naqinnernik ilisarsisinnaanngillat ilaallu immikkut atuartsinermiittariaqarlutik inunnguusiminnik peqquteqartumik pisinnaasaat killeqarmata. Meeqqat pisinnaasaat aallaavigalugu atuarfeqarfik aaqqissuuttariaqarparput, meeraq qitiutillugu. Soorlu atuagarsornermut soqutigisallit, assarsornermut soqutigisallit.

Taamaattumik assersuutigalugu akulliit alloriarfianut atuartup pinerani atuartitsiviit sammi-vilersorneqarsinnaapput imaalillugit: atuagarsornermut, assassornermut, immikkut atuartitsineq. Taamaalilluni meeqqat pisinnaasaat aallaavigalugit atuartitsineq aallunneqalerpat qularnanngilaq meeqqat atuarfianit soraarummeereernerup kingorna sunngorusunnermut ingerlaannaq ikaarsaari-artoqarsinnaassasoq, ullumikkutuulli amerlasuut karakteritik qaffassaaqqaarlugit aatsaat ilinni-aqqiffissamut ikaarsaartoqartarmat.

Ukiut qulit sinnerpaat atuarfeqarneq pillugu inatsit allanngortimmalli piffissanngorpoq nutartereq-qinnissamut piffissanngorpoq inuiaqatigiimmi ingerlaartuarput ilinniarfeqarfiillu amerligaluttuin-nartut piumasaqaatillu qaffasipput. Tassuuna siunnersuuteqartoq isumaqatigaarput.

Nutarterinermi nalilersorneqartariaqartutut Naleqqamiit isigaarput atuarnerup suliffeqarnertulli aaqqinneqarsinaanera, assersuutigalugu ullormi atuarfimmit atuarunnaarluni angerlaraanni qaratsap qasuersaartittarnissaa, ilinniagassaqaarluni angerlanerani qaratsap pisariaqartimmagu qasu-ersaarnissaq. Soorunami tamanna annertuumik suliaqarnermi soorlu projektiliornerit eqqarsaataan-ngilaq. Kisianni nukarlerni, akullerni angajullernilu atuartitaaneq eqqarsaatigineqarpoq.

Aammalu ullumikkut attaveqaatitigut qarassasiakkut atuartitsineq annertusiartornerani nunarsuarmi suminngaaniillunniit atuartitsineq ingerlanneqarsinnaanera ilanngullugu qanoq ingerlanneqarsin-naanersoq nalilersorneqarnissaa. Ilaatigut uani eqqarsaatigaarput Qeqqata Kommuniani misilitta-gaallualereersoq “granny-cloud” tassa sumiiffimminngaani iliniartitsisoq allameersoq ilaatigut Australiameersoq tuluttut ilinniartitsinini ingerlakkaa. Nunaqarfinni ilinniartitsisussaaleqiffiusuni tuluttullu oqaasianik ilinniartitsisussaaleqiffiusunut naleqqulluinnarmat.

Sumiiffinni atuarfiit ataasiakkaat iluatsittumik ingerlasarput sumiiffimminni pitsutsit minnerun-ngitsumillu atuartut pisinnaasaat aallaavigalugit ingerlatitsinikkut.

Ajoraluartumilli Naalakkersuisoq siunnersuummik itigartitsivoq marsimi 2023-imi Ilinniartitaaneq pillugu isumasioqatigiisitsinissaq ilaatigut peqqutigalugu.



Naleraq

Naleqqamiit kissaatigaarput siunnersuut ataatsimiititaliamut ingerlanneqartariaqartoq ataatsimiititaliallu ataatsimiinnermini kissaata isumasioqatigiinnermut ilanngunneqartariaqartut.

Taamatut oqaaseqarluta Naleqqamiit kissaatigaarput siunnersuut ataatsimiititaliamut ingerlatinneqassasoq.